

**Kalaallit Nunaata kangiani Tasiilami nunaqarffinilu, kiisalu Ittoqqortoormiini aalisarnikkut ikaarsaariartornermi qanoq inuussutissarsiornikkut siuarsaasinnaanissaq pillugu apeqquteqaat aallaavigalugu oqallisissiaq.**

(Inatsisartunut ilaasortaq Emanuel Nûko Naleraq)

### **Akissuteqaat**

(Aalisarnermut Piniarnermullu Naalakkersuisoq)

Apeqquteqaat aallaavigalugu oqallinnissamik soqutiginaartumut siunnersuuteqartoq Emanuel Nûko, Naleraq, Naalakkersuisut sinnerlugit qutsavigaara.

Kalaallit Nunaat tamakkerlugu aamma Tunumi inuussutissarsiutitigut ineriartortoqarnissaa tamatta soqutigisaraarput. Innuttaasut amerlanerusut imminnut pilersorsinnaatillugit inuiaqatigiinnullu tunniussaqaartillugit inuiaqatigiit nukittunerusut atugarissaarnerusullu pilersis-savagut. Taamaattumik immikkut pisariaqartitsisunut Tunu ilanngullugu sumiiffinni inuussutissarsiutit ineriartortinneqarnissaannut tapiissutinik qinnuteqarnissamut periarfissanik arlalinnik Naalakkersuisut periarfissaqaartitsipput.

Aalisarnermut tunngasuni aalisarnermik inuussutissarsiutip ineriartortinnissaanut immikkut tapiiffigineqarnissamut periarfissat arlaqarput. Aalisarnerup ineriartortinneqarnissaanut aningaasaliissutit immikkoortitat, aningaasat immikkoortitat angallammik anginerusumik pisinermut tapiissutigineqartarput aamma taarsigassarsiat erniaqanngitsut taarsersugassaanngitsullu, aningaasat immikkoortinneqartut umiatsiaaqqanut tapiissutigineqartarput, taavalu aallarteqqinnissamut tapiissutigineqartarlutik, aammalu aningaasanut inatsimmi kontoqarpoq 50.01.20, tassani ilaatigut isorliunerusunut Tunu ilanngullugu inuussutissarsiutinut tapiissutinut tunngatillugu immikkut malittarisassaqluni.

50.01.20-mut tunngatillugu Tunu, Qaanaaq Qimusseriarsuarlu immikkut soqutigalugit 2020-imi 2021-milu immikkut 1 million kr.-inik Inatsisartut immikkoortitsipput. Kuummiuni tunitsivimmu innaallagissap aqquataanut ikkuffia pitsaanerulersinniarlugu Nukissiorfinnut 2020-imi millionit tamakkerlugit tunniunneqarput. Taamaaliortoqarpoq tunitsiviup qerititsi-nermut piginnaasaata annertunerulersinnissaanut periarfissaq qulakkeerniarlugu. Tunumi aalisarnerup ineriartortinneqarnissaanut suliniutinut sisamanut 2021-imi katillugit 650.333 kr.-init tapiissutit tunniunneqarput, taakkununga ilaapput bundgarnersornermut ilinniarneq, bundgarnersornermut atortunut tapiissuteqarneq, Tasiilamut Ittoqqortoormiunullu ningittak-kanik atortut ilanngullugit misileraalluni aalisarnermut tapiissuteqarneq, aamma Tunumi aalisarneq pillugu isumasioqatigiinnermut, ukiaq manna ingerlanneqartumut aalisarnermut soqutigisaqartunit peqataaffigineqartumut.

Aalisartunut piniartunullu inuussutissarsiutaannik ineriartortitsinermut atatillugu Aalisartunut Piniartunullu Siunnersuisoqarfik siunnersuisussaasoq pikkorissartitsisussaasorlu Naalakker-suisut aamma tapersorsorpaat. Tamatuma saniatigut Aalisarnerup ineriartortinneqarnissaanut aningaasaliissutit immikkoortitat aqqutigalugit angallatinik atortunillu pisinermut kiisalu angallateqarnerup nutarterneranut atatillugu angallatinik pisoqqanik isaterinermut tapiissutinik periarfissaqarpoq. Ukiuni 2016 – 2021 umiatsiaaqqanut qinnuteqaatit 39-t tiguneqarput

umiatsiaaqqallu aqqaneq marluk pisiarineqaramik akiata 84%-a angullugu tapiissuteqarfigineqarput, tamannalu ilaatigut Tunumut immikkut iluaqusiivoq.

Kangerlunni imartatsinnilu aalisagaqassusianik misissuinnerit annertusinerisigut aalisagaatitta amerlassusaat pillugit ilisimasagut annertunerulersittariaqarivut ataatsimut isigalugu Naalakkersuisut kissaatigaat. Taamaaliortoqassaaq piujuartitsinerup ineriartornera aamma siunissami kinguaariit isumalluutitsinnik pingaarutilinnik atuisinnaanerat qulakkeerniarlugu. Naalakkersuisut Tunumi aalisarnissamut periarfissat pillugit annerusumik ilisimasanik pissarsiniarlutik Tunumi misileraalluni aalisarnermik ukiuni 2014 - 2021 pilersitsipput, aalisagaqatigiinnik assigiinngitsunik soorlu qaleralinnik, saarullinnik saattussanillu angallatit aalisarsinnaangortillugit. Misileraalluni aalisarnerit takutippaat Tunumi aalisarnerulersinnaaneq periarfissatut ilimanaateqartoq aamma sinerissap qanittuani aalisarnermut pisassiissutinik aalajangersaa-soqarsimangimmat aalisartut periarfissatik tamaasa aalisarsinnaavaat.

Tamatuma saniatigut Namminersorlutik Oqartussanit aamma kommuneqarfik Sermersuumit peqataaffigineqartumik Tunumi ineriartortitsinerumut periarfissat pillugit inuussutissarsiutit arlallit akimorlugit suliniutinik ineriartortitsinerumik suliaqartumik Naalakkersuisut suleqatigiissitamik pilersitsipput.

Taamaalilluni suliniutinik ilorraap tungaanut sammisumik aallartitsisoqarpoq. Tunumi aalisarnerumut amerlanerusut ikaarsaartinniarlugit suliniutit allat aallartinneqartussat suugaluar-pataluunniit pingaaruteqarpoq pissutsit piviusut akuerinissaat piffissamillu atuinissaat akueralugu. Pisariitsunik sukkasuunillu aaqqiissutissaqanngilaq. Tamaviaaruttariaqarpoq aaqqiissutit isumaqatigiissutigineqartut inuussutissarsiortut, kommuni Namminersorlutillu Oqartussat qanimut suleqatigalugit aatsaat siuarsarneqarsinnaammata. Taamaattumik aalisarnerumut ikaarsaarnerep tapersersornissaanut salleraanissartik innuttaasut inuussutissarsiortullu akuerisariaqarmassuk pingaaruteqarpoq. Innuttaasut aalisarnerumut ikaarsaarnissamik kissaateqarpata imaluunniit tunitsivinnik aallartitsiniarpata Kommunimit Namminersorlutillu Oqartussanit tapersersorneqarnissaat periarfissagissaarpoq kisianni tassunga inuit suliniuteqarnissaanik pisariaqartitsivoq.

Tunumi aalisarnerumut piviusumik ikaarsaarnermik aallartitsineq iluatsissagutsigu taava inunnit aalisarnerumut ikaarsarusuttunit aamma ingerlatseqatigiiffinnit Tunumi aalisarnerup ineriartortinnissaanik periarfissatut ilimanaateqartutut isiginnittunit ingerlanneqartariaqarpoq.

Naalakkersuisuniit taamatut oqaaseqarluta Inatsisartut oqallinnissaat qilanaaraarput.